

A PITA GÃN NA TU AYI

^I Maa Simon Pita na ı a Yesu Kırısto gbãgbaa ni a wɔ nıtõnãa le seere a gãn nyã korɔ a yin na tu a si Nãanmın yeltorsi pɔ, ni a si Fafaara Yesu Kırısto na yi nye a soɔfo 'lo na kpẽme a si kaar.

^{II} Wãefo ni nyã'maar a doolo yi taa tu a bõɔfo yin bõɔ Nãanmın ni a si Soro Yesu.

^{III} A Wɔ kpẽɔ le wɔ kɔn si bon jaa sɔn buɔɔ a nyevɔr nyã jũu ni Nãanmın puor vɔla tu a si bõɔfo sɔn bõɔ a 'lo na buɔl si, ni a wɔ mãe tɔr ni a wɔ maal vɔla.

^{IV} Tu anyãna pɔ le wɔ kɔn si a bon na berma ni a bõsõn won tɔr a nee ıka, a tu a pɔ, ka yin puɔ a befo 'lo na ba sõɔnõ ε, na yi jo yi a wer nyã a yelbier vɔlaa na sõɔ.

^V A anyãna jũu, yi mõ na yi de vɔla maalfu puɔ a yi soɔfo pɔ, na yi de bõɔfo mɔ puɔ a vɔla maalfu pɔ,

^{VI} ka a mãe nyɔɔfo mɔ puɔ a vɔla maalfu pɔ, ka a nɔbir mɔɔfo puɔ a mãe nyɔɔfo pɔ, ka a Nãanmın puor vɔla puɔ a nɔbir mɔɔfo pɔ,

^{VII} ka a yeer maal vɔla puɔ a Nãanmın puor vɔla pɔ, na yi de nõfo puɔ a yeer maal vɔla pɔ.

^{VIII} Bojũu ala ı yi tara naa anyãna a jaa ka a puɔɔ 'yõɔnõ, an sõɔ yi naa ka yi kõ tara yãan na yaa tõɔnõ wõnõ wõmõ a bõɔfo yin bõɔ a si Soro Yesu Kırısto ε.

^{IX} Tıche ala ı nure baa tara a anyãna ε, waa nyere ε, na wɔ ı jõɔ, na wɔ ñin ıka Nãanmın peen a wɔ kõro jaa yeldebe bar.

X A le jũu n yee, yi ba gber ka a yi boolfo ni a yi chel irfo i yelmãe. Ala i yin maala a anyãna, yaa be jaa na wa lo e.

XI Ka a sor yuo ko yi a yi kpe a si Soro ni a Fafaara Yesu Kiristo naalõo na ba tara baarfõ pɔ.

XII A le in ma jee yi naa a yelsi anyãna, yi gba na bõo yaa ka yi ba gber ara a yelmãe yin tara pɔ.

XIII A tara na sor ka n jee a yi tier in chene voro a agãn vaar pɔ,

XIV bojũu n bõon naa ika a kõ le kor e tiche ka n kpi e, nitãa le a si Soro Yesu Kiristo na man ko ma.

XV In i naa le jaa in na tõo, maa wa soo kpi, ti ka yi ma chene tõo tiere a yelsi anyãna.

XVI A ba i fuol ni ye 'yer le si de 'yer ko yi a kpẽo ni a si Soro Yesu Kiristo waa e, tiche sin mãe le nye a wo kpẽe ni nibir.

XVII Wo nyen 'yõofu ni tur yi a Sãa Nãanmin se le a kokor na yi a tur jikpẽe jie wa a wo se 'yere, "Nyã le i a n Bie 'lo in nõ, a wo yele pel naa n pɔo."

XVIII Sin mãe wõn a kokor nyãna na yi a saaju wa, an i sin ni 'lo jaa le dõo be a tõcheche par.

XIX Sin le tara a Nãanmin 'ye'yerbe na dõo be be 'yer na chaar, yi yuo toor chele a 'yer. A kaara naa fika chãa na chaara libe pɔ, ti tãn a wer na chaar ka a bivie nmerbir pur 'yõo a yi nyãn pɔ.

XX A yelkpẽe le ika, yi bõo a par ika Nãanmin 'ye'yere jaa kõ tõo de a wo ye wiil a ala na seb a Nãanmin gãn pɔ par e.

XXI Bojũu nũre maa kpu 'yer a Nãanmũn 'yer ε, tũche nũre ma 'yer a le na yi a Nãanmũn sẽ, an ı a wσ Sıε le tara ba.

II

I Tũche a jir ņmarba 'ye'yerbe mı dõo be be a nũbe pσ, nũtãa le a jir ņmarba wiwiilbe na wa be a yı pσ. Ban sσol wiil sõofσ 'yer, na ba chũr a Tõofσ Sσo na da ba na ba waan sõofσ wa 'yõo a ba mãε.

II Nıyoo na turo naa a ba vã sσı anyãna, tı na ba kperε a yelmãε sσr.

III A bσgar wiwiilbe banyãna na 'mõon yı naa nı a ba nenõo 'yerbie. Nãanmũn guor naa a ba 'yer kõro jaa ka a ba sõsõonõ ba guro ε.

IV Bojũu Nãanmũn ba dõo bar a malakası bala na maal a dεer ε, tũche wσ 'yõo ban a bσo fulom libe 'lo pσ bar chele nı a ba 'yer tσorfσ daar.

V Waa dõo bar a kõr nũbe ε, na wσ vẽ ka a kõo wa paal pσo a bala na ba puoro ε, tı na wσ faa a Nowa na ı yeltorsı 'yer mσolo nı nũbe ayopõı.

VI Nãanmũn den bũu chom a Sodom nı a Gomora nũbe ka a di lıeb tãpıel, a nıtõ wiil ıka le le na ı a bala na ba puoro ε.

VII Wσ mı faa naa Lotı na ı a nıtor a wσ pσo na ma sõon a bala na tõnõ a dεbe.

VIII Bojũu a nıtor nyãna lõon kpiere nı ba bıbir jaa, ka a wσ tıer ma sõo le won ma nye tı wõ ban ıre.

IX An ı nıtõ le a be, a sı Soro bõon le won pãa na ı faa a bala na puoro yin a wõm pσ, tı tara a bala na ba puoro ε, a ba be a ba gefo pσ tı tãn a 'yer tσorfσ bıbir.

X A anyāna ɪn yelmāe a bala na turo a ba āgān sōona nyā dēer vɔlaa, baa turo a kpāen dēme nēe ε. Ba ɪn jukpāen dēme na ba 'mɔɔrɔ ba māe, baa joro dābāe ε, tɪ ma kperε a saaju bōmaalsɪ.

XI Tɪche a malakasɪ gba na ɪ gādaar na ba tara kpāen, ba maa 'la kpe a bōmaalsɪ anyāna a sɪ Soro niem ε.

XII Tɪche a nɪbe banyāna ma fere naa nɪ a bonsɪ ala ban ba bōɔ a par ε. Ba kaara naa mɔdōn kaar bōmaalaa na ba tara tɪere, ba dɔɔ ba naa na nyɔɔr ba kɔ, ba mɪ kaara a mɔdōn kaar na ba mɪ na wε.

XIII A dēer ala ban maal, a dēer ala le ban yāan ba a sān. A ba tɪer vɔlaa ban ma maala a mōtōɔ, a nōmō ba naa, ban lōon dire nɪ yɪ na ban sōo a yɪ befo 'yōɔ yɪ vā.

XIV A ba nɪbie sēen naa a sēsēyele, a ba maa bar dēer ɪfɔ ε. Ba ma bele naa a bala na bal na ba ɪ bɔgar dēme, ba ben pɔ'yōɔfɔ pɔ.

XV Ba bar a sɔr dē dē 'lɔ tɪ bɔr, na ba tu a Balaam na ɪ a Beor bidaba sɔr. 'Lɔ le nō sāyar na ba ɪ ε,

XVI tɪche wɔ nyen a wɔ bawōno tōnō, bōɔ na ɪ dōɔ den nɪre kɔkɔr 'yer 'yer na wɔ ŋmaan a 'ye'yere nyāna dābol yele sɔr. 1

XVII A nɪbe banyāna ɪ naa fɪka kɔlsɪ na ba tara kōɔ ε, bu uul sēsεbe na furo chiine. Libe jaa gbεb le guro ba.

XVIII Bojūu yobo 'yer pɔrsɪ le ba ma 'yere, na ba buɔɔ a āgān vɔldεer, na ba bele nɪ a nɪbe bala

1 II:XVI 2:16 Balaam dōɔ ɪ Nāanɪmɪn 'ye'yere na sɔɔ ɪka wɔn den libie tɪ pɔ 'yōɔ a Isral nɪbe. Wɔn wa chiine, malaka ŋmaa wɔn sɔr ka waa tōɔ ɪ a le ε. (A Sorfo Gān 22-24)

na faa joro a bala na bɔr sɛ̃.

XIX Ba ma tɪr nɛɛ kɔ ba ɪka ban faa ban a gbãgbayeले पɔ, tɪche ka a bala mãe ɪ a yelsõõnsɪ gbãgbaar, bojũu nɪre ɪn gbãgbaa kɔ bon 'lo jaa na tõõ wõ.

XX Ala ɪ ba faan ba mãe yin a wer nyã bõdɛer पɔ, ban wa bõõ a sɪ Soro nɪ a Fafaara Yesu Kɪrɪsɪto tɪ na ba le tɪ kpe a ala पɔ ka a tõõ ba, a ba baarfõ na ɪn dɛer gar a le ban dõõ be.

XXI An taa sa naa ala ɪ baa ta bõõ a sɔr toraa ɛ, gar ban ben bõõn tɪ lieb puor 'yõõ a nɛbin cheche 'lo ban de kɔ ba.

XXII Bala 'lo, a sɔkpa nyã ɪn yelmãe ban dõõ lob ɪka, baa lieb tɪ di a ala won tɪ bar, (*Sokpar Gãn 26:11*) ka a dobaa ban so kõõ mɪ lieb tɪ mamar a memere.

III

I N barmine, a gãma ayi sɔõ le anyã ɪn sɛere kuro yɪ. A jaa ayi पɔ, n sɛb ɪka n le jeõ yɪ tɪer 'lo na tor पɔ.

II N bũorõ naa ɪka yɪ lieb tɪer a 'yerbie ala a Nãanmun 'ye'yercheche bala na dõõ 'yer a sɪ Soro nɪ a Fafaara na dõõ man ba tu a wõ nitõõnsɪ 'yõõ.

III Yɪ de nie bõõn ɪka a ber baaraa sõõ, nũlaarba na turo a ba ãgãn volaa na wa naa wa laara yɪ.

IV Ban wa sɔrõ yɪ naa, “Nyɪne le a 'lo na tɪr a nɛɛ kɔ yɪ ɪka won wa naa? A le daar jaa a sɪ sãamune na kpi a yelsɪ a jaa mɪ chene na chiine a le ne an piel.”

V Tɪche ba bõõn naa tɪ maala fɪka ba ñin naa a kõro jaa an ɪ Nãanmun 'yerbie le wõ maal a saaju, nɪ a tɛe a kõõ ju, nɪ a kõõ par.

VI A tēkor, kōō mī lē dōō paal pōō a wer a wō sōō.

VII A 'yer nyāna nī wō ju lē wō bar a saaju, nī a tēe go gun a 'yer tōōrfō, na won sōōn a bala na ba puoro ε, nī būu.

VIII Tiche yī ta iin a yelbō'yen nyāna ε, n barmine. A sī Soro sē, bībir bō'yen kaara naa fika yuon tur, ka a yuon tur kaara fika bībir bō'yen a wō sē.

IX A sī Soro ba baala nī a wō nēε won tīr ε, nītāa lē a barmine na 'yer ūka a kor naa ε. Wō din kānyir kō yī, won ba bōōrō ūka āsōō jaa wō wε ε, tiche yī lēb a yī tīr.

X A sī Soro bībir na wa naa fika lē nānyie na ma wa, ka a saaju pōōn gōmō wō jaa, na wō po chen. A bonstī ala na be a saaju ka a būu nyl na wō pāa yuo yele a jaa a nībe na maala ka a gā chāa pō.

XI An ū a bonstī a jaa na wa sōōn a nītōnō, nībotō lē a sēε ūka yī ū? A sēε naa ka a yī maalfō ū cheche, na yī puoro Nāaŋmīn,

XII nītāa lē yīn ben kaara a Nāaŋmīn waa bībir na yī 'mī'mine nī a wō waa. A bībir nyāna na waan nī sōōfō, a saaju wō jaa na di naa, ka a bonstī a jaa mī nyl nī a tōl.

XIII Tiche sīn chele naa tēpaalaa nī a saaju paalaa na ū a nītorstī tēe, 'lō a Nāaŋmīn na tīr ā nēε.

XIV A lē n barmine, yīn pāa na chele a anyāna jūu, yī mōō nībir na yī taa tara chefō nī mabfō jie ε, na yī tara wō nī nyā'maar.

XV Yı tıer a anyã ıka a sı Soro kãnyir ı naa a yı faafõ le, nıtãa le a sı yebe Põol mı na dõõ seb kũ yı nı a yẽ 'lo a Nãanmın na kũ wõ.

XVI A wõ gãma a jaa põ, a 'yer bõ'yen le wõ seb, na wõ 'yerε a yelsı anyãna. A wõ gãma põ yelsı ben be na ı tuo a par bõõfõ, ka a ba bõõ nı a a bala na ba bõõ ara dẽme lıeb a bur bur nıtãa le ban lıer a Nãanmın gãma amıne, ka a na ı ba mãε sõõfõ.

XVII A le jũu, n barmıne, yın ben de nie bõõn a nıtõ, yı guro a yı mãε ka a ba belfõ ta wa vẽ ka yı faa lo tı bar a yı gber bafõ jie ε.

XVIII Tıche yı nõõnõ a sı Soro nı a Fafaara Yesu Kırıtıto wãefõ nı a wõ bõõfõ põ. 'Lo le so a tur a põpãanyã, nı bıbir, nı a bıbir jaa. A ı a le.

**A Nãanmun Nɛtur Oaalaa Gãn, Burfoor
Birifor, Southern: A Nãanmun Nɛtur Oaalaa Gãn,
Burfoor New Testament**

copyright © 2006 Wycliffe Bible Translators, Inc.

Language: Birifor, Southern

Contributor: Aramaic Bible Translation, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

97b1f1fe-19fd-52d9-9481-ad2a6ade2772